

魏
书

第三
卷
八
册

新
平
船
湖

PDG

前上十志啟

臣收等啟昔子長命世偉才孟堅冠時特秀靈章前詰裁勒墳史
紀傳之間中以書志緒言餘迹可得而聞叔峻刪緝後劉紹統削
撰季漢十志實範遷固表蓋闕焉曹氏一代之籍了無具體典午
終世之筆罕云周洽假復事播四夷盜聽聞有小道俗言要奇好
異考之雅舊咸乖實錄自永嘉喪圯中原淆然偏僞小書殆無可
取魏有天下踳蹤前載順末克讓善始令終陛下極聖窮神奉天
屈已顧眎百王指掌萬世深存有魏撫運之業永念神州人倫之
緒臣等肅奉明詔刊著魏籍編紀次傳備聞天旨竊謂志之爲用
網羅遺逸載紀不可附傳非宜理切必在甄明事重尤應標著搜
獵上下總括代終置之眾篇之後一統天人之迹編心末識輒在
於此是以晚始撰錄彌歷炎涼採舊增新今乃斷筆時移世易理

不刻船登閣含毫論敘殊致河溝往時之切釋老當今之重藝文
前志可尋官氏魏代之急去彼取此敢率愚心謹成十志二十卷
請續于傳末并前例目合一百三十一卷臣等妨官秉筆迄無可
採塵黷旒冕墮深冰谷謹啟

十一月持節都督梁州諸軍事驃騎將軍梁州刺史前著作郎
富平縣開國子臣魏收啟

平南將軍司空司馬修史臣辛元植

冠軍將軍國子博士修史臣刁柔

陵江將軍尚書左主客郎中修史臣高孝幹

前西河太守修史臣慕容懷文

魏書卷一百五之一

天家志一第一

夫在天成象聖人是觀日月五星象之著者變常舛度徵咎隨焉然則明晦暈蝕疾餘犯守飛流欽起彗孛不恆或皇靈降臨示譴以戒下或王化有虧感達於天路易稱天垂象見吉凶觀乎天文以察時變書曰曆象日月星辰敬授民時是故有國有家者之所祇畏也百王興廢之驗萬國禍福之來兆勤雖微罔不必至著於前載不可得而備舉也班史以日暈五星之屬列天文志薄蝕彗孛之比入五行說七曜一也而分爲二志故陸機云學者所疑也今以在天諸異咸入天象其應徵符合隨而條載無所顯驗則闕之云

大祖天興五年八月天鳴

六年九月天鳴

皇始二年十月壬辰日暈有珮璫占曰兵起天興元年九月烏丸張超收合亡命聚黨三千餘家據勃海之南皮自號征東大將軍烏丸王鈔掠諸郡詔將軍庾岳討之

天興三年六月庚辰朔日有蝕之占曰外國侵土地分五年五月姚興遣其弟義陽公平率眾四萬來侵平陽乾壁爲平所陷六年四月癸巳朔日有蝕之占曰兵稍出十月太祖詔將軍伊謂率騎二萬北襲高車大破之

天賜五年七月戊戌朔日有蝕之占曰后死六年七月夫人劉氏薨後諡爲宣穆皇后

太宗神瑞二年八月庚辰晦日有蝕之

世祖始光四年六月癸卯朔日有蝕之占曰諸佐非其人神麀元

年二月司空奚斤監軍侍御史安頡討赫連昌擒之於安定其餘
眾立昌弟定爲主走還平涼斤追之爲定所擒將軍巨堆棄甲與
守將高涼王禮東走蒲坂世祖怒斬堆

神䴥元年十一月乙未朔日有蝕之

太延元年正月己未朔日有蝕之

四年十一月丁卯朔日有蝕之

太平眞君元年四月戊午朔日有蝕之

三年八月甲戌晦日有蝕之

六年六月戊子朔日有蝕之占曰有九族夷滅七年正月戊辰世
祖車駕次東雍州庚午圍薛永宗營壘永宗出戰大敗六軍乘之
永宗眾潰斬永宗男女無少長皆赴汾水而死

七年六月癸未朔日有蝕之占曰不臣欲殺八年三月河西王沮

渠牧健謀反伏誅

十年夏四月丙申朔日有蝕之

六月庚寅朔日有蝕之占曰將相誅十一年六月己亥誅司徒崔浩

十一年十二月辛未日南北有珥

高宗興安元年十一月己卯日出赤如血

二年三月日暈

興光元年七月丙申朔日有蝕之

和平元年九月庚申朔日有蝕之

三年二月壬子朔日有蝕之占曰有白衣之會六年五月癸卯高

宗崩

顯祖皇興元年十月己卯朔日有蝕之

二年四月丙子朔日有蝕之占曰將誅四年十月誅濟南王慕容
白曜

十月癸酉朔日有蝕之占曰尊后有憂三年夫人李氏薨後諡思
皇后

三年十月丁酉朔日有蝕之

高祖延興元年十二月癸卯日有蝕之占曰有兵二年正月乙卯
統萬鎮胡民相率北叛遣寧南將軍交趾公韓拔等滅之

三年十二月癸卯朔日有蝕之

四年正月癸酉朔日有蝕之占曰有崩主天下改服有大臣死五
年十二月己丑征北大將軍城陽王壽薨六年六月辛未顯祖崩
七月丙寅日有背珥

五年正月丁酉白虹貫日直珥一

承明元年三月辛卯日暈五重有二珥

太和元年冬十月辛亥朔日有蝕之

二年正月辛亥日暈東西有珥

二月乙酉晦日有蝕之占曰有欲反者近三月遠三年四年正月癸卯洮陽羌叛枹罕鎮將討平之

九月乙巳朔日有蝕之占曰東邦發兵四年十月丁未蘭陵民桓富殺其縣令與昌慮桓和北連太山羣盜張和顏等聚黨保五固推司馬朗之爲主詔淮陽王尉元等討之

三年春正月癸丑日暈東西有珥有珥戟一重北有偃戟四重後有白氣貫日珥狀如車輪京師不見雍州以聞

三月癸卯朔日有蝕之占曰大臣誅四月雍州刺史宜都王曰辰有罪賜死

四年正月辛酉日東西有珥北有珮日暈貫兩珥

五年正月庚辰日暈東西有珥南北並白氣長一丈廣二尺許北有連環暈又貫珥內復有直氣長三丈許內黃中青外白暈乍成散乃滅

七月庚申朔日有蝕之

七年十二月乙巳朔日有蝕之

八年正月戊寅有白氣貫日占曰近臣亂十年三月丁亥中散梁眾保等謀反伏誅

十一年十一月丁亥日失色

十二年三月戊戌白虹貫日

十三年二月乙亥朔日十五分蝕八占曰有白衣之會十一月己

未安豐王猛薨

十四年二月己巳朔未時雲氣斑駁日十五分蝕一占曰有白衣之會九月癸丑文明太皇太后馮氏崩

十五年正月癸亥晦日有蝕之占曰王者將兵天下擾動十七年六月丙戌高祖南伐

十七年六月庚辰朔日有蝕之

十八年五月甲戌朔日有蝕之

二十年九月庚寅晦日有蝕之

二十三年六月己卯日中有黑氣占曰內有逆謀八月癸亥南徐

州刺史沈陵南叛

十二月甲申日中有黑氣大如桃

世宗景明元年正月辛丑朔日有蝕之

七月己亥朔日有蝕之

二年四月癸酉日自午及未再暈內黃外白

七月癸巳朔日有蝕之

八月戊辰日赤無光中有黑子一

三年正月乙巳日中有黑氣如鵝子申酉復見又有二黑氣橫貫
日

二月辛卯日中有黑氣大如鵝子

七月丁巳朔日有蝕之

正始元年十二月丙戌黑氣貫日

壬子日有冠珥內黃外青占曰天下喜三年正月丁卯皇子生大
赦天下

三年二月甲辰日左右有珥內赤外黃

辛亥日暈外白內黃

十月乙巳日赤無光

十二月乙卯日暈內黃外青東西有珥北有背巳時白虹貫日

永平元年三月己酉日南北有珥外青內黃暈不匝西北有直氣長尺餘北有白虹貫日

八月壬子朔日有蝕之

二年八月丙午朔日有蝕之

丁卯旦日旁有黑氣形如月從東南來衝日如此者一辰乃滅

三年二月甲子日中有黑氣二

十二月乙未日交暈中赤外黃東西有珥南北白暈貫日皆匝

四年十一月癸卯日中有黑氣二大如桃占曰天子崩延昌四年

正月丁巳世宗昇遐

十二月壬戌朔日有蝕之在牛四度占曰其國叛兵發延昌二年

正月庚辰蕭衍郁州民休玄明等斬送衍鎮北將軍青冀二州刺史張稷首以州內附

延昌元年二月甲戌至于辛巳日初出及將沒赤白無光明

五月己未晦日十五分蝕九占曰大旱民流千里二年春京師民饑死者數萬口

二年閏月辛亥日中有黑氣占曰內有逆謀三年十一月丁巳幽州沙門劉僧紹聚眾反自號淨居國明法王州郡捕斬之

五月甲寅朔日有蝕之京師不見恆州以聞

三年三月庚申日交暈其色內赤黃外青白南北有珣可長二丈許內赤黃外青白西有白暈貫日又日東有一抱長二丈許內赤黃外青

肅宗熙平元年三月戊辰朔日有蝕之

丁丑日出無光至于酉時占曰兵起神龜元年正月秦州羌反二月己酉東益州氐反七月河州民却鐵忽聚眾反自稱水池王

四月甲辰卯時日暈市西有一背內赤外黃南北有珥內赤外黃

漸滅

十二月己酉日暈北有一抱內赤外白兩傍有珥北有白虹貫日神龜元年三月丁丑白虹貫日占曰天下有來臣之眾不三年十一月乙酉蠕蠕莫緣梁賀侯豆率男女七百口來降

二年正月辛巳朔日有蝕之

正光元年五月乙亥朔日有蝕之占曰有大臣亾七月丙子殺太傅領太尉清河王懌

二年五月丁酉日有蝕之夏州以聞

三年正月甲寅日交暈內赤外青有白虹貫暈外有直氣長二丈

許內赤外青

五月壬辰朔日有蝕之占曰秦邦不臣五年六月秦州城人莫辨大提據城反自稱秦王

十月己巳太史奏自八月已來黃埃掩日日出三丈色赤如赭無光曜

十一月己丑朔日有蝕之占曰有小兵在西北四年二月己卯蠕蠕主阿那瓌率眾犯塞

四年十一月癸未朔日有蝕之

五年閏月乙酉日暈內赤外青南有珥上有一抱兩背內赤外青三月丁卯日暈三重外青內赤占曰有謀其主孝昌元年正月庚申徐州刺史元法僧據城反自稱宋王

十二月丙申日暈南北有珥上有兩抱一背

孝昌元年十二月丙戌白虹刺日不過虹中有一背占曰有臣背其主一曰有反城二年九月己卯東豫州刺史元慶和據城南叛三年十一月戊寅辰時日暈東面不合其色內赤外黃東西有珥內赤外黃西北去暈一尺餘有一背長二丈餘廣三尺許內赤外黃

莊帝永安二年三月甲戌未時日暈三重內黃赤外青日暈東西兩處不合其狀如抱

五月辛酉日暈東西兩處不合

辛未申時日南有珥去一尺餘有一背長三丈許廣五尺餘內赤外青

七月丙寅直東去日三尺許有一背長二丈餘內赤外青半食頃從北頭漸滅至半須臾還如初見內赤外青其色分炳